

YO YWĀNI UYU?



Akusaye ugwe, nkundwe. Ikyene kyo kinunu fiyo ukwisa ku nyumba ya Ntwa.

² Une ngwīnogòna ukuti une nāfundaga i Lisimbo limo, akabalilo kamo aka kakindilepo, kangi Ilyene lyāyobile ukuti akabalilo kāko Yeso āsegelīle ku Yerusalemu, ukuti abafūndigwa balinkufyūsyā ifisige fyābo kangi balinkukabona akāya akīkèmo mbutali, kangi abēne bikwānda ukusangaluka nukuyoba, ukuti, “Lilino ngimba ikitangalala kisakupyanikisigwa.”

³ Kangi u nnyambala yumo uyu āyobāga, pamo ukuyoba isya luyāto lwalululu ku Palestina, kangi umwene alinkuyoba ukuti abandu lilino, nkyīnja iki kyākindaga, bīsaga ku buyo mpaka, akabalilo kāko abēne bikwīsa mmwanya ukufuma nkikoga kangi bikukēta ukusyūngutīla i nguto, u nsebwe gulagula uyu Yeso na bafundigwa bāli pa kabalilo kala, ukuti akabalilo kāko abene bikukēta a kāya, abene bikwanda ukukuta.

⁴ Umwe mumenye, une ngwitika, kyālipō ikindukimo abafundigwa bala, mmasiku gala, bālīpilīke, ukuti—ukuti ikitangalala kikupyanikisigwaga kangi.

⁵ Kangi lilino akene ko kifuki kabalilo. Kangi une ngwitika ukuti ikyo kyo bwīpilīke ubu buli pa bāndu, ukuti ikitāngalāla kyo kifuki kitendekesigwe ukupyānikisigwa kangi.

⁶ Nkundwe Neville, gwaipyana kangi untimi gwitu unsayigwa, afumile itolo ukumbūla une isya akabōmbo ka luyigo aka kakwīsa apa pa kipānga, mu kilo ināndi isi sikwīsa, ukuti twīputilēge ngepo. Kangi une ndinkumbula umwene, une ngwinogona ukuti ikyene kikuyaga kindu kisayigwa.

⁷ Ugwe itolo ukabagīla ukuya ni sasanio nyingi fiyo. Kangi utubalilo twingi uswe tukwega inyinogono insobi sya lusasanio. U luyigo lukaya fiyo—fiyo ukuya ukutwāla nkati abāndu abapya, lōli ukwēne ko kuyiga iki uswe tutalile tuli nakyo. Kangi une ne. . .

⁸ Une nīganile ukuyoba iki, panongwa yakuti une nguyoba ikyēne ukufuma ku busolofu bwa ndumbula yāngu. Ukuti une nāndile ukwāga ubwīpilīke ubukīndane ukusyūngutīla i kipānga ukukīnda iki kifumile pakuya kukabalilo katali, u bwīpilīke bwa—bwa amīnogōno agamwambepo amasolofu, ngati mūmo ikyēne kyālisibīle ukuya, akabalilo katali iyolo; aka ikindukimo iki kikusēngama, kangi ikyēne kili nalo u lwālo lwanalōlilōli. Kangi une ngusubila ukuti Kyala isakusayaga ikipanga ikinini iki, kangi. . .?. . . kangi mu m'maka gake.

⁹ Kangi une nguketa ulubatiko lwa kuyenga lukukindilila, kangi une ngwinogona ikyo kyo kindu kikulumba. Kabuno, lululupo pamo pankyenipo, uswe twe bāndu bakāngalepo tukuyaga pakufūla ikilwilabwīte nukukipapo ikyēne ukugomokesya m'maboko ga bāna bītu, kangi nukwēnda pamwanya pa Njilayamafyūkilo iyagolidi yila.

¹⁰ Ilisiku limo une ndinkukinda sinda-gwa-njila gwa bung'wale lilino, ugwa fyinja malongo mahano mbukusi. Une itolo ngabagila ukukyagania ikyo. Kitikuboneka ngati akēne kakafuma kabalilo nakamo ukufuma pāpo une nākwābaga ifyalilūka kuli Chris Meisner, ukufwana kalongo-na-lwele, kalongo-na-ntandatu, kalongo-na-lwele mbukusi. Loli itolo nābukile pa buyo bumo. Ikyene kikubuka ukunangisya itolo ukuti apa uswe tukaya nako akaya akakukindilila, loli uswe tukulondalonda Kamo akākwise. Kangi ako ko Kāya kūko Kyala yo njengi, kangi kula kutisakuyamo siku nu bumalikisyo kula.

¹¹ Ulubunju ulu, mumo une nāyobelāga pa kimanyisyo kya Lisiku lya Māma, nukugela ukumbīkapabuyo u māma komma mūmo umwēne nalōli ali, mu ngulilo ingāngāle, ni nginya, na fyōsa ifi, ingili yāke, pamo ikikota kyamagudumu ikya iyolo, pamo ikikota kya lukōngi, kangi nakandeko akanini aka maluba kitūgēsye kifuki nu mwēne; lōli māma mu busyūke, agomosīgwe kula ku butubwa bwāke, kangi imile, ukumulika ngati mwēhe. Iyo yo njila une ngwiyela ukwīnogona isya māma gwāngu. Une ndikulonda ukummwinogonela umwēne bo umwēne ali umwisyugu, unkāngāle. Une nīganīle ukwinogona isya iki kikwisa. Kangi une mmenye umwe mukwipilika injila yila isya bamāma bīnu. Inogona isya umwene mumo umwene naloliloli ali mu ndumbula yake. Palema nalinga bīngi. . . bo umwāti ikuyoba, “Ubūmi bukaya bupepe kuli umwēne, lōli umwēne abagile ukwitūga ubwēne mōsa kāngi, itolo ukubōmba ikindikimo kuli ugwe.” Popāpo Kyala ikuyaga pakutēndeka ikyēne injila yimo ukuti umwēne abagile ukuya mūmi kwa bwilanabwila na ugwe. Popāpo une nhobwīke panongwa ya ikyo.

¹² Une ngamanya nongwa ya fiki, une ndendike ulufumusyo ulu, ulubunju ulu, iki une nguyobaga ikilo iki, linga u Ntwa ikwitikisya, pa: *Yo Ywāni Uyu?* Nalōlilōli ngamanya mūmo une nguyaga pakubōmba ikyēne. Lōli une nālikolēnie lōsa mpaka kifuki isala na maminiti kalongo aga gakīndilepo, pa malālusanio pamūsi pōsa, kangi nāli ni fyāpasima kangi—kangi ingōlelo mbimbibi. Une ndinkutoligwa ukusitēndeka isyēne.

¹³ Kangi une ngulōnda umwe ukukīndilila ukummwīputīla Dokotala Sam. Umwēne—umwēne ikwisa mula kanunu, kangi uswe tuli bakupālisya. Kangi Dokotala Baldwin nu Nka. Baldwin bosa-babili bikubūmbuluka. Abēne bikufika mula kanunu.

¹⁴ Une ngulōnda umwe ukubīka ikipya kimo pa lubātiko lwīnu ulwa lwīpūto, pamūsi apa. Uyo yo Harry Lease pāsi apa, umūlisya-mikota. Harry yo mwinake gwa une gwānīmwenē. Kangi bo mūmo une nummanyile umwene, une ninogonaga umwene aali Nkristi, mpaka pamusi apa, akabalilo kako u nkundwe gwake ātendike ubusume bwa bupoki bwa moyo gwake. Nkundwe Mike Egan ātwēle i...inkyūngafyūma gwītu apa, ātwēle i nōngwa. Kangi Harry ali mbwitugasye ubupalapala, panja ku kipatala. Une ngāmenye umwene ālinogwine fiyo sila isya une; loli, umwēne alinkunkāna untimi gwake mwene, pamusi apa, pamo untimi gwa kipanga kuko umwene ikubuka, kangī aalondaga une ukwisa ukumbona umwene. Kangi une ngulōnda ukubūka ukunkēta umwēne. Popāpo, ipūtila Harry.

¹⁵ Uswe tuhobwike apa, ikilo iki, ukummwāgānia, bo binangu apa, ukufuma kula mu Georgia, Nkundwe Welch Evans kangī i kikolo kyake. Une nguketa, kangī, abayāti abangi aba une ngābamenye abene, lumo bāli apa ulubunju ulu.

¹⁶ Linga une ngasoba, une ngumbona Nkundwe na Kalumbu Elmer Collins kunyuma kula, ukufuma ku Phoenix, Arizona. O, ugwe ukānduka mma. Kuboneka ngati ugwe gwābagile ukuya mu myēnda gyāko gya pa nsebwe gwa sitima, kangī—kangī kwisa nkati ukufuma ku nsebwe gula. Kangi āmbilīgwaga ukugomokela ku kāya! Une ngabagīla ukukusūma ugwe ukusyāla kuno, 'nongwa yakuti ugwe gwābwāgile ubuyo ubununupo, muketile, ikyo kyo kinunu fiyo, Phoenix. Ngulōnda ukwitugasya kula, ilisiku limo, nīmwenē.

¹⁷ Kangi polelo une ngumbona Nkundwe Smith apa, ugwa Kipanga kya Kyala, panja pala. Nkundwe Smith, akēne kapēgigwe kwa une, u būku gwāko unnini, ilisiku limo, pamo mmayolo pamūsi, bo kwīlīle. Une ngāli ngalibala ilyēne, lōli nalōlilōli nisakulītikisya ilyēne, akabalilo kōsa une mmēnye ugwe gwāsīmbole ilyēne. Ilyene libagisenye ukuya lyābwānaloli, i Lisimbo ilyabwanaloli. Kyala akusaye ugwe. Kangi une ngusūbīla ikylene kyo buponjoli.

¹⁸ Kangi bīngi abangi, une nābagīle ukuyoba. Umwe mwesa mukwambilīgwa apa ku kipanga. Kangi une nālikyēlīle ulwimbo lula, ulubunju ulu, ulwa Kalumbu Stricker uyu īmbīle, “Umwene ikukētēsya ukwisila mu bulatiko, ku mwene.” Abakūndwe bāngu ba kiMennonite apa, nhōbwike ukuya na bēne muno. Kangi, o, aligwēsa gwa umwe! U mwīnāngu apa, une ngwītika, ukufuma ukukilania mu Illinois, umwānake ikwēga ifyakwēgelela ku nyuma, ngufikaga ukwāgāna na bēne kāngi. Kangi bīngi fiyo, une mbagile. . . Komma ukwinogona une ngukuyōnga ugwe linga une ndikuyikolela ingamu yako, loli une itolo ngwāmbilīla umwe mwesa.

¹⁹ Lilino unko uswe tubale ikilo iki, ku kimanyisyo kya

Lisimbo, ukufuma mwa Matai untu gwa 21, ukwānda pa linandi lya 1, nukubala pāsi, kangi lya 11, ukōngānia.

Kangi akabalilo kāko abēne balinkusegelēla ku Yerusalemu, pala palinkwisa, kangi balinkwisa ku Betifegi, ku kām̄ba ka Māfilu, polelo alinkubatuma Yeso abafūndigwa babili,

Ikuyoba ku bēne, Būka nkāya ukukilania kifuki na umwe, kangi mu njila ya kutalula umwe mwisakwāga imbūnda yipinyigwe, kangi akafalasi akanyāmbala ni yēne: ukusyābula isyēne, nukusitwala isyene kwa une.

Kangi linga unnyāmbala aligwēsa ikuyoba kalikōsa kwa umwe, umwe mwisakuyoba, U Ntwa ali nubufūmbwe ni syēne; kangi lululu ulu umwēne isakusituma isyēne.

Fyosa ifi fyaabombigwe, ukuti icyēne kyābagile ukufwanikisigwa iki kyayobigwe nu nsololi, ikuyoba,

Babūla...a bānabalindwāna ba Siyoni, Kēta, u Mwalafyāle gwāko ikwisa mbōlōlo...itūgēsye pamwanya pa i mbūnda, ni falasi i ngeke iya mbūnda.

Kangi abafūndigwa balinkubūka, nukubōmba mūmo Yeso ābalagile abēne,

Nu kutwāla i mbūnda, kangi ifalasi innnyāmbala, nukubika pa syēne imyēnda gyābo, kangi balinkumbika umwēne pamwanya pala.

Kangi i kilūdilo ikinywāmu fiyo kilinkubālūla imyēnda gyābo mu njila; kangi balinkutumula isāmba ukufuma mmipiki, kangi balinkubalania isyēne mu njila.

Kangi i kilundilo iki kyaabukaga pankyeni, kangi kila kyakongaga, balinkulila, nukuyoba, Hosana kwa mwanundumiana gwa Davidi: Nsayigwa yo umwene uyu ikwisa mu ngamu ya Ntwa; Hosana mu mwanya ukukinda.

Kangi akabalilo kāko umwēne ālisile nkati mu Yerusalemu, akāya kōsa kāgutigwe, bikuyoba, Yo ywāni uyu?

Kangi ifilundilo fyāyobile, Uyu yo Yeso unsololi gwa Nazareti... .

Unko uswe twinamisye imitu gyitu ku lwiputo.

²⁰ O Ntwa, uswe tukuswiga itolo iki uswe angali tuyobile, linga uswe twitugasyaga mmasiku gala. Loli uswe tuli nu bumi mu lisiku ilikulumbapo, akabalilo kako uswe tukundonda Umwene ukwisa. Kangi bo uswe tukutendeka ubwitendekesye, Ntwa, ega indumbula syitu sitendekesigwe, nu kutwāla nkati gyōsa imisigo igi uswe tubagile ukubūngānia ukufuma ku

migūnda igwamfūnjo, kōsa-kubili ku kāya kangī pānja, uswe tukwīnogōna kangī mu kugūlīla pa kabalilo aka uswe twisakumbonaga Umwēne ikwīsa, itogīle pa falasi inyēlu, ikusuluka ukufuma pa fifigo fya Lwimiko, ukwāndūla nukubūmba igi imikāngale imibolano imibili gya uswe, ukubuka mu mbili ugwalwīmiko umfwāne bo u Gwāke gwēne, kūko kakabagīla ukuyako ubutulwanōngwa nabumo, pamo ikimanyilo nakimo ikya bufwe ukwīngilamo siku. Kangī uswe twisakumbona Umwēne bo Umwēne ali, nu bumi, kangī nukungana Umwēne mu ngulilo syosa isi sikwisaga.

²¹ Uswe tukukupalisya Ugwe panongwa ya kipanga iki kangī panongwa ya ntimi gwāke, kangī panongwa ya bakyungahela na badiakoni, kangī panongwa ya mundu aligwesa uyu ikwisa apa; kangī panongwa ya bayāti aba bali mfipata fyītu, aba bo ng'osi sya ntimo gumogwēne, lōli ukufuma ku kibaga ikīngi. Uswe tukusuma ukuti Ugwe kubasayaga abēne, ikilo iki, nu Kuyapo Kwāko.

²² Kangī tuswilaga uswe pa Lisyu Lyako, ukuti uswe tubagile ukubuka ukufuma kuno, ikilo iki, nu kwīkasya ukuya Bakristi banunupo ukukinda mumo uswe twāyililemo siku. Tulibūkāga uswe nu lusūbilo ulupya mu ndumbula yītu, kangī nu buhofu, ukugūlīla ku Kwisa Kyāke.

²³ Linga nu lusako babāgile ukuyangapo bamo pakati pa uswe, aba babine kangī bonywa, uswe tutisakwibwa ukwīputila abene. Ukuti abēne. . .Ukwisa mu kiyumba, ikilo iki, kūko uswe twībūngēnie ku bwīpūti, ukwisa muno, babine, abene baligomokelāga kanunu.

²⁴ Kangī uswe tubagile ukusūmila bābo aba bikubūmbulūka, ntwāya kangī mfipatala, kangī bali pa fitala fya bōnywa. Uswe tukusuma, O Kyala, ukuti i kisa Kyako kisakufikila pāsī ku bene.

²⁵ Uswe tukwīputilāga bala bābo batikupāsya, ikilo iki, aba bakāli bokōnja nukukēta u Ntwa yo nnunu, aba batikumanya iki ikylene kikusanusya ukuya baganigwa na Kyala. Abene itolo batikupilikisya iki abene bikupōndwa. O Kyala, ngusuma ubufumusye bumo bwa rediyo, pamo injila yimo, palamasya indumbula syabo, ni nyenyemusyo syābo sibagile ukusanusigwa kwa Ugwe bo kikāli i kifigo kya kisa ukwīgaligwa kangī abēne nkwiagaligwa pānja, ukwīma amabulōngi kisita kisa.

²⁶ Tutula uswe, Ntwa. Ifindu ifi uswe tukusuma mu Ngamu ya Ntwa Yeso, kangī ku lwimiko Lwāke uswe tukusuma ikylene. Ameni.

²⁷ Abāndu bāli fiyo balūndēne ukusyūngutila ifipata, kangī ingīndi syāli syālundene, kangī bukālīko nu buyo nabumo kuli abāndu ukugonako. Abēne bālāmbalēle pānja pa kibūmba, pōsa pa lubīngilo, panongwa yakuti uyu āli yo pāsa. Kangī abandu bikwisa ukufuma nkisu kyosa kyapasi, ukwīputa pa kabalilo aka. Akēne kālī kabalilo kāko u kang'osi gwa pāsa

ābūtīgwe. Kangi i . . . Ikyēne kyīmilāga ulubāngo lwābo ukufuma ku Igupti, u butumwa. Kangi abēne bākyūngile iki, ikyinja kilikyōsa. Ikyīnja kilikyōsa, u pāsa unkulumba uyu ābonekaga pabuyo. Kangi akēne kāli kamo mwa tubalilo utwāpamwānya ukukīnda utwa i . . . pamo ifyakuboneka fya bwīputi bwa kiYuda, panongwa yakuti akēne kāsanusyāga akabalilo aka abēne bāponesigwe.

²⁸ Abāndu bōsa bīganīle ukwinogona isya ikyo, akabalilo kāko abēne bāponesigwe. Mūmo fikuti aligwēsa gwa uswe, ikilo iki, tubagīle ukugomokela ku kabalilo kāko uswe twāponesigwe! Iki ikyēne kyāsanusyāga kwa uswe!

²⁹ Une mbagīle ukukūmbukila mbwisibile bwāngu bwēne, isya mūmo imbelakisa indumbula yāngu yākilumiana yānyonywaga ukumpalamāsyā Kyala. Une ndinkwinogona, “O, linga une nābagile itolo ukubuka kula nukukung’usya pa kifigo Kyake, nu kuyoba kwa Umwene pakabalilo kanini!” Kangi, ena, umwe mumenye akapango kangu. Une ndinkwiyeḡēla nimwēne ikalatasi ni kisimbilo, kangi nāyaga pakunsimbila Umwene u kalata, ’nongwa yakuti une ngābagīle ukuyoba ku Mwene. Kangi une nāmenye ukuti Umwene itugalāga mmatengele, panongwa yakuti une nālimpilike Umwene, kangi une nākubwene u Kwake ukwendendeka mmatengele. Kangi a—a kamo, akayila akakūlu aka une nālisibile ukubūka pāsi akabalilo kāko une nābagile ukufwīma pamo ngubūka ukulob’iswi. Une ndinkwinogona, “Une ngutulikaga itolo akene pa mpiki, kangi ukuyobela akene kwa Tata. Yeso.” Itolo i njila yimo ukuti u nsigo gula gubagile ukuya ukufuma mu ndumbula yangu.

³⁰ O, ikilo kila, pāsi kula! Une mbagīle ukwībwa ubukusi bwāngu, une mbagīle nukwībwa ingamu yāngu akabalilo kamo, lōli une ngabagila ukwībwamo siku isala yila akabalilo kāko Umwēne ālīmbonīsyē une ukufuma ku butulwanongwa. Ikindukimo kyābonike pabuyo, pasi nkati mwa une, ukuti ikylene kindūlile une ukukīnda isala ingulumba mu ngisi. I sala ya lubāngo lwāngu, ubusito bwa butulwanōngwa bwālīndekīle une, kangi une nāli mūndu umpya. Une nāli kipeligwa kipya mwa Kristi Yeso, ukufuma kulakula.

³¹ Kangi abaJuda aba, abene bīsaga pala, ikyinja kilikyosa. Kangi yālipo i—i nyibuko nkati nkipanga. Kangi abēne balinkwēga u—u nkati, kangi ilisēke ilikālī, kangi a kang’osi, kangi abēne balinkunwa ukufuma ku nyībūko iyi nkipanga. Kangi abene balinkusangaluka palikimo panongwa yakuti Kyala ābanangisye abene ubukūndwe. Popāpo, aka ukuya kabalilo ka pāsa, kangi akālī mwēne pāsa mma, lōli umwēne āli pāsa gwapasima.

³² Umwe mumenye, utubalilo tumo utu uswe tukubuka ku kipanga kangi. . . Uswe akabalilo kōsa tukwīgāna ukubūka, lōli tulipo utubalilo tumo utu ikīndukimo ikyapasima kikuboneka.

³³ Kangi aka kāli kamo ka tubalilo tula. Imbepo yanyenyemusigwe nu bugūlili, itolo mūmo icyēne kiyīlile umwīsyūgu. Gōsa a māso ga bala bābo bālingānile umwēne gākētesyāga kuli Umwēne ukwīsa nkati ku kipata.

³⁴ Kangi une ngwitika icyene kyo bubombelo ubukulumba injila yila umwisyugu, kabuno bala aba banganile Umwene bikundondesya Umwene. Imbepo yinyenyemusigwe nu bugūlili.

³⁵ Akabalilo kāko, uswe tukwītūgàla mu lisiku ili, akabalilo kāko i kīsu kyo naloliloli, kīsile ukuya kamo akakulumba akatini ka bupufuke. Kangi sayansi yikutubūla uswe, “Agene itolo ma miniti matatu mpaka kilo pakati.” Kangi une nsīsimikīsyē umwe mwābalāga, bo une, ilisiku ilīngi, akapāngo kala isya nkūlumba-gwa-bwīte mu sikali, alinkuti, ukuti, “Linga bwalipo ubwīte ubungi, ubwēne bwābagīle itolo ukumalika mu maminiti mabili pamo matatu.” Amasiku gaiyolo agakulwīla, kangi ukutusulila indusu, nukukūmba ifibwīna fya bakāmbwe, ago go gamalīke. Abēne bikwīyobela ubwīte ubukōnge bwisa itolo ukuya mabili pamo maminiti matatu. Ilisiku limo, yumo u mūndu unsulikīgwe ikuyaga pakupufula ikīgalilo kyāke ukusōsyāpo nukutusulila limo mwa fipufulilo fila. Kangi akabalilo kāko abēne bikubōmba, uswe tuli nafyo ifitumigwe fyakupilikisya, kulikōsa, ukutusulila icyēne ukugomokesya kāngi. I kīsu itolo kikabagīle ukwikāsyā ikyo.

³⁶ Aligwēsa kwa pāsa āmēnye ikīndukimo kyāyāga pakuboneka, lōli abēne bakāmēnye itolo iki icyēne kyāli.

³⁷ Kangi iyo yo njila icyene kiyilile umwisyugu. Kifuki aligwesa amenye ukuti ikīndukimo kikwitendekisye ukuboneka. Aligwesa amenye ikyo. Ugwe ubagīle ukuyoba ku ntulwanongwa, ugwe ubagīle ukuyoba ku bakylulisi, ugwe ubagīle ukuyoba kwa aligwesa, kangi, o, akēne ko kabalilo kasitakutūsa ka luko aka kīsu.

³⁸ Loli ugwe ubagīle ukuyoba ku nnyambala pamo u nkikulu ūyu ikundonda Umwene ukwisa, kangi ulwimiko luli pa kisyo kyabo, lukumulika panja. Abēne bikukētēsya ku kyakubōmbīgwa ikikulumba kila. Popāpo i mbepo yōsa yinyenyemusigwe kangi, ukugūlila ikīndukimo ukuboneka. Ikisu kyapasī kitikumanya iki kili kifuki ukuboneka, loli i Kipanga kya Kyala gwabumi kimenye iki kikubonekaga. Abēne bikumanya ikyo lululu ulu ingangabwite yisakukūba, kangi uswe twisakumbona Umwēne ikwīsa, itogīle ukufuma ku Lwīmīko, pa falasi inyēlu, kangi ababwite ba Kumwanya balinkunkōngēsya Umwene. Kangi bala aba bafwīle mwa Kristi bisakunyakiligwāga nukwēgigwa mmwanya ukwakwāgāna nu Mwēne mu mbepo. Ikyo kyo iki uswe tukulondesya. Uswe twisyukile panongwa ya icyene.

³⁹ Kangi uswe tubūlīgwe ukuti imyoyo ya bamāma bala, na fyosa bo ifyo, uswe twāyobilemo ulubunju ulu, itolo pāsī pa

kigemo kya Kyala, bikukūta, “Kabalilo katali bule, Ntwa? Kabalilo katali bule?” Māma ikulōnda ukukukēta ugwe ukuya fīyo mūmo ugwe kulōnda ukunkēta umwēne. Kangi abaganigwa bitu bikulōnda ukwāgana na uswe bōpe bo mūmo uswe tukulōnda ukwāgana nabo.

⁴⁰ Bo bwībūnganie-kangi buki icyēne kisakuyaga, akabalilo kāko Umwēne ikwīsa! Ukwāgana na baganigwa bitu kangi ukubabona abene mu mbili gwabo ugwa busyūke, kangi gwīmikigwe, nukwendendeka ukusyūngutila nu gwakilingo gwa busyūke, ikukētēsya akayīlo kābo, mūmo akēne kāndukile, ubōlōlo kangi ubwakimyemye. Kangi icyēne kitisakuya kwīkolania nu kubēla, kangi ukunyēla nu kuyūgānia, kabuno uswe tuli nayo Syēpwa ukwitūgāla palikimo.

⁴¹ O, iyi ingulumba ingulilo iyalunyenemusyo iyi uswe tukwītūgalāmo, itolo kisita kabalilo nakamo kuli nakimo, itolo ukufyūka, kangi ukuyūgānia, kangi ukukamanda, fiki, ilyēne lyo lisiku ilitiliseye.

⁴² Polelo, bo abene bagūlīle ku kindukimo ukuboneka, icyēne kyāli kibībi fiyo ukuti bīngi ba bala ku pāsa bakāfilēmo siku ukumbona Umwene. Napāpo, abēne bāmēnye ikindukimo kyāyāga pakuboneka pa buyo, lōli pōpe abēne bakāfikileko ukumbona Umwēne.

⁴³ Momumo ukwene kwisakuyilaga pa Kwisa kwa Ntwa. Balipo abandu bingi abasitalutūsyo, umwisyugu, aba bamenye ukuti ikindukimo kītendekisye ukuboneka, loli abene—abene batisakumbonamo siku Umwene. Kabuno Umwene isakwisilaga nkimyemye kya kilo-pakati, ukunyakilila ukusōsyāpo kala akanini a Kapānga aka kīsūyūkilē kangi kakugūlila kangi kakulōndēsya ukunkēta Umwēne. Abo bo bala Umwēne isakwīsa nu kunyāka. Bīngi ba nkīsu aba bikwitūgāla pa bwitabwāle, kangi ukusekela imyoyo gyābo pa findu fya nkīsu, batisakumanyamo siku iki kyābonīke, mpaka i Kipanga kikīndīle mu Lwīmīko, kabuno Umwene isakwisaga ngati nhiyi nkilo nukubakola abene panja. Polelo uswe tubagile ukukēta uswe tugomokīle kangi ku buyo bulabula. Lilino uswe tukusyāgania, ukuti, ubugūlīli ubu, ukuti Kyala ikwisa ku bala bābo. . . Mōsa ukukinda mu Masimbo, icyene kifumile pakuya kindu kilakila. Ukuti abēne bo. . . Umwēne akabalilo kōsa ikubonekela ku bala bābo bikungūlīla Umwēne, akabalilo kōsa ku bala bābo bikulōnda ukumbona Umwēne. Kangi une nsisimikisye ukuti ulu lo lusubilo ulu luli pa ndumbula syitu ikilo iki.

⁴⁴ Ukwene kuli kifuki imyesi ntāndatu igi gikindilepo, une ngusakisya, une nagelaga ukuyoba ku bandu bamo. Kangi une ndinkuti, “O, ukwinogona isya icyene, ukuti itolo kifuki akabalilo kosa Umwene ikwisaga!”

45 Kangi iki kyambelaga une ukuyoba isyo, une nayobaga isya Nkundwe Bosworth. Akabalilo kâko une nâbükile ukwakunkêta yula umwîkêmo unkângâle, akabalilo kâko uswe twâpilike umwêne âfwâga, malongo-lwêle-ni-kindukimo ifyînja mbukusi, unkasi na une ngubuka ukusuluka ku . . . kula ukunkêta umwene bo akâli ukufwa. Une itolo ndinkufimbilisigwa ukuyoba ikindukimo ku mwene. Une nîganile ukukêtësya abîkêmo akabalilo kâko abêne bikwîngîla mu Lwîmîko, kangi une ndinkufimbilisigwa ukumbona umwêne. Kangi uswe tôkyâga amatayala ukufuma mu ligâli.

46 Lôli bo une mfikile kula, kangi ndinkubopela ku kifigo, mu kanguto akanini âlambalêle yula unkângâle umzee. Umwêne alinkufyûsa u mutu gwâke mmwanya bo umwêne âlimbwène une ngwîsa. Agâke amakângâle, amaboko amasitamaka galinkwitûlika pânja, nu nnyôfu gwîtulike pâsi. Kangi umwêne alinkufikila ingôngi syâke kuli une. Kangi une ndinkunkôla umwêne ukusyûngutîla ilikosi nukukûta, “Tâta gwângu, tâta gwângu, amagilêta ga Israel, kangi abanyâmbala ba falasi bali pala,” kabuno umwêne âli nkemesigwe, nnyâmbala gwabunyakyala.

47 Kangi une ndinkuti, “Nkundwe Bosworth, une ngulonda ukukulalusya ugwe ikindukimo. Ngimba ugwe kwitika ukuti ugwe kuyaga kanunu?”

Umwene alinkuti, “O, une ngaya mbine nukuya mbine mma.”

Une ndinkuti, “Mulimôsa, fyo fiki fitamisye?”

48 Umwene alinkuti, “Une ngubuka ku Kaya.” Umwene alinkuti, “Une ngatele, kangi une mmalike. Kangi une ngulonda itolo ukubuka ku Kaya.”

49 Une ndinkuti, “Polelo ugwe kusyagania ugwe kufwa?” Une ndinkuti, “Une ngulonda ukukulalusya ugwe i kindukimo. Kunyuma ukusuluka ukukînda ifyînja malongo-mahano-namabili nifyakôngelelâpo ifya butumigwe, kyo fiki kifumile pakuya miniti yâko iyâl wîmîko ukukînda? Ngimba ugwe ubagîle ukuyoba kwa une, nkulumba, kangi mbula une ngimba kyo kyakukubonekela nki ugwe gwâli nakyo, pâsi pa lukîndi, ukuti ugwe gwâbagile ukubala sala yako ingulumba ukukinda.”

50 Une ngwitugalaga ukuketa ingulilo yake, une ndisakwibwamo siku, bo amaso gangisi gala gangolile une, pamwanya pa mandalasi gala. Umwene alinkuti, “Nkundwe gwangu umpala, aka ko kabalilo akakulumba ukukinda aka bumi bwangu. Une ngabagila ukwinogona isya kabalilo kalikosa aka kali ko kalwimiko ukukinda lululu ulu.”

51 Une ndinkuketa umwene nkisyo, kangi une ndinkuti, “Nkulumba, ndimba ugwe ukâli umenye ukuti ugwe kufwa?”

52 Umwene alinkuti, “Nkundwe Branham, une ngulambalala apa, ngugulila i miniti yiliyosa kuli Umwene ukwigûla i kifigo

kila nukwisa, ukunyega une ku Kaya nu Mwene.” Iyo yo njila iya kufwa. Iyo yo njila iya kubuka.

⁵³ Kangi mūmo umwe mumēnye, ukuti, kifuki isala sibili bo akāli umwēne ukufwa. . . Umwēne āli, āfumile pakulāmbalala nu kusilika, kuli ukukilania amasiku mabili. Kangi akabalilo kako umwene ālisīle ku mwene, umwene alinkufyuka nkyumba, nukwanda ukuyoba ku nkasi gwake. Polelo, mbimbibi itolo, umwēne alinkuboneka ukuya gwakulāngāla. Kangi umwēne āponēnie amaboko, ku sala yōsa pamo ukongelelāpo, na bīnake, aba bafwīle ku fyīnja malongo mana pamo malongo mahano, aba bāli bapīnduke bāke nkipānga kyāke. Ukuponania amaboko nu nna nu gwise. Mpaka umwēne āli. . . ubūmi bwāgulekile u mbili, gulāmbalēle pāsī pa kyākwīgēmēsya kangi gulinkubūka ukugon’utulo, mu ngōngi sya Ntwa Yeso. Kikayako nakimo ngati ukumbōmbēla Umwēne, ukungūlila Umwēne.

⁵⁴ Kangi bo une njobile ku nnyambala uyu ukufwana na iki, nukumbula ubwendelo bula, une nāyobile iki. Une ndinkuti, “Nkulumba, o, ngimba ikyene kitisakuyaga kyalwimiko akabalilo kako uswe tukumbona Umwene? O, linga Umwene ābagile ukwisa umwisyugu!”

Umwēne alinkuti, “Nkundwe Branham, komma ukutīlisya abāndu bo ulo.”

Une ndinkuti, “Ngimba ugwe kusanusya fiki?”

⁵⁵ Umwēne alinkuti, “O, komma ukugela ukubabūla abāndu ukuti ikīsu kikwīsa, pamo Kristi ikwīsa. Ikyēne kikubatīlisya abēne.”

⁵⁶ “O,” une ndinkuti, “umma. Une ngusuma ugwe gwāndisye kangi. Ku bala bābo bikundondesya Umwēne, ikyēne kyo nongwa iyalwīmiko fiyo iyi abēne bābagile ukupilika, ukuti Yeso yo itolo kifuki ukulepula ukukīnda usakwēga i Kipānga Kyāke.” Ubukāngāle bwisakusanusigwaga ku butubwa. Ubuhobofu bwisakupīgwāga mbuyo bwa busulumanie. Ubumi bwisakupīgwāga mbuyo bwa bufwe. Kusitakufwa mbuyo bwa bufwe, fisakupyānikisaniaga. O, ko kabalilo kaki, ukumanya ukuti Umwene isakwisaga!

⁵⁷ Abēne bāndōndāga Umwēne. Abēne bāngūlilāga Umwēne. Kangi akabalilo kāko Umwēne ikwīsa, uswe tukwāga ukuti fyāli ifiyabo fibili. Ikibugutila kimo kyāli kuli Umwēne, kangi kimo kyāli kyakulwana nu Mwēne.

⁵⁸ Kangi iyo yo njila uswe tukukyāga ikyēne umwīsyūgu. Ikyo kyo iki, ukwīsa Kwāke, akabalilo kōsa kupāgulēnie abāndu. Akabalilo kalikosa, akabalilo kako ugwe kummwaga Yeso, ugwe kwaga bala bābo babagile ukukanikana ni Kyene. Uyo yo Sétano. Kangi, umwīsyūgu, akabalilo kāko uswe tukwīnogōna isya ikyēne, uswe tutikukēta ulwānduko ulwīngi. Itolo kilakila.

Abāndu basanusígwe, lōli u mbepo gwa bāndu akasanukamo mma.

⁵⁹ Popāpo akabalilo kāko abēne kubumalikisyo bākētīle pānja ku kipata nukumbona Umwēne ikwīsa, itolo pa kala akanini, akambūnda akēlu, fyōbēne abafundigwa balinkwanda uku—uku ukukūta, “Ikitangalala kya Kumwanya kīsile!” Abāndu balinkubopa ukwāgāna nu Mwēne, kangī gwēsa Yerusalēmu afuluganikēne. Kilipo ikindukimo ukufwana ni kyene, akabalilo kako Yeso ikwisa, ukwēne akabalilo kōsa ko kufuluganikana. Kangī a kāya kōsa kāfuluganikēne. Kangī abēne—abēne bakabagila ukufisa ikyēne.

⁶⁰ Kangī abalūmbilili ba lisiku lila bāfīmibilisigwaga ukupa ubulīngānio panongwa ya bufuluganike ubu, panongwa yakuti ulwēne lwāli lusekelo lwa pāsa. Kangī abēne balinkulāta, “Yo ywāni Uyu?” akabalilo kāko i mbepo yānyenyemusigwe, kangī ukwīsa kwa Ntwa Yeso, ku Yerusalēmu, kwānyenyemwīsyē imbepo nu bugūlīli, ikyēne kikuboneka ngati abamanyisi bikulōndigwa ukumanya iki kyayaga pakuboneka pa buyo. Ikyēne kyābonekaga ngati u mpūti unkulumba ābagīle ukuti āmēnye ikyēne. Ikyēne kyābonīke ukufwāna ukuti bōsa abāngi abapūti babagīle bākīmēnye ikyēne.

⁶¹ Kangī ikyene kikasanusya kilikyosa, umwīsyugu, panongwa yakuti u Mbepo Mwīkemo ikutala ukwīsa kwa Ntwa Yeso. Kangī bo u Mbepo Mwīkēmo ikwānda ukwibālūla pānja ukukilania i kīsu, imyōto gya luyigo gikwīlasulania pānja, kulikōsa, ifimanyilo ifikulumba ni fiswīgo fibōmbigwe, imibūmbulusyo gibonike pa buyo, isololi sibūkile pānja. Syōsa i imbunganio sya sayo sya batumigwa sigomokile ku Kipanga kangī. Popāpo, mumo ikyene kyayilile akabalilo kala, momumo kiylile ikyene lilino, u mbepo gwa nsitakwitika akāli ikukūta panja, “Yo ywani Uyu?”

⁶² Bamo mwa bene bitikaga pa Ntwa Yeso, ukuyoba ukuti Umwene ali Nnyambala unnunu. Bamo mwa bene balinkuti, “Umwene yo Nnyambala unnunu.”

⁶³ Ikyo kyo iki abēne bikuyōba umwīsyūgu. Abēne bikugela ukumbīka Umwēne ukuya Napoleon, ugwābwīte. Abēne bikugela ukumbīka Umwēne ukuya yo—yo George Washington, nnyāmbāla gwanalōlīlōli. Lōli Umwēne āli nkinda ukukīnda ikyo.

⁶⁴ Ngimba umwe mwākētesīsyē ukubala kwa Lisimbo? Abēne balinkuti, “Uyu yo Nsololi uyu ikufuma ku Galilai.”

⁶⁵ Kangī abene bikugela ukuyoba ikindu kilakila umwīsyugu, akabalilo kako abene bikububona ubugute ubunywamu ubwa Ntwa: ukupyanikisya ukugomokela, ku bukafu, ababine na bonywa; ukumbona Umwēne ikubōmbēla u Mbepo Gwāke mu Kipanga Kyāke, ukumanya aminogono ga bāndu; ukunkēta Umwene ikubomba mumo itolo Umwene ābombile akabalilo

kako Umwene áli pa kisu, ukufwanikisya iki Umwene áyobile kikubonekaga; naloliloli, ifipánga kangí abánda bali, bikulálùsya iki, “Yo ywáni Uyu?”

⁶⁶ Abene bakāpilikísye ukuti Yeso áli, panongwa yakuti nayumo mwa bene ábagile ukummwagania Umwene, ukwisila mmasukulu gābo. “Yo seminale nki Umwēne áfumileko? Ngimba yo sukulu nki ya bufundakyala Umwēne áfumileko?”

⁶⁷ Kangi momumo kiyilile ikyene umwisyugu. Bingi ba bandu aba bapakiigwe na Mbepo Mwikemo bakaalisile ukufuma ku sukulu yiliyosa mma. Abēne bo fyakukōnga fya busale bwēne bwa Kyalá. Loli ifimanyilo ni fika, kangí ifiswigisyo ifi fyafingiligwe mwi Bangeli, fikukōnga uyu unkulumba Mbepo Mwikemo bo Ikyēne kikwēnda nkati mbānda.

⁶⁸ Kangi abene bikuti umwisyugu, “Yo sukulunki iyi abene bikufumilako?” Itolo mbibimbibi pápo ugwe kwingila nkaya, ukuya nu lusasano, “Kyo kipanga-kipāgúke kiliku iki ugwe uliko?”

⁶⁹ Une nāli nukuyobesania pa Kihano pamusi, nu mpūti gwa kiKatolika gwa kiRoma ukufuma ku kipanga kya kiIrishi mu Louisville. Kangi bo une ngōngelelapo nukwiyoba nīmwe ne ku mwēne, u nnunu unnyāmbala gwasukulu, umwene alinkuti, “Tata. Branham, kyo kipanga-kipāgúke nki ugwe uli nakyo?”

Une ndinkuti, “Une ngaya na nakyo nakimo mma.”

Kangi umwene alinkuti, polelo, “Ngimba ugwe gwāsayiligwe?”

Une ndinkuti, “Ena, nkulumba.”

Umwene alinkuti, “Ywani akusāyile ugwe?”

⁷⁰ Une ndinkuti, “U Ntwa Yeso álimbele une u Mbepo Mwikemo, ukulumbilila Inongwainunu, kangí alimbele une ubutumigwe.” Mulimōsa, ubo bo busūnguligwe ubu uswe tukufūmba.

⁷¹ Yeso akāyobilémo siku ku bafūndígwa Bāke, “Būka panja ku...” Une ndikulōndésy’ubusobi ifindu ifyo, lōli ifyēne fītūgéle ilisiku lyābo. Umwēne akāyobile, “Būka, manyila ukuya ndumbilili, kuli ifyīnja *fyakuti-ubwīngi*.”

⁷² Umwene alinkuti, “Gūlila umwe nkaya ka Yerusalemu, mpaka umwe mupegigwe na Maka ukufuma ku Mwanya.” Umwēne áyobile ikyo ku banyāmbāla aba bātologwāga ukusimba ingamu syābe bēne. “Kangi ukufuma pa iki, u Mbepo Mwikemo isile pa umwe, polelo umwe mwisakuyaga baketi Bangu, bosa-babili mu Yerusalemu, Yudai, Samaria, kangí ku fiyabo fya kubutali fiyo ifya kisu.” Uko ko busūnguligwe.

⁷³ Uswe tukaya nu busimbígwe nabumo isyakuti Yeso ábūkilémo siku ku sukulu yiliyōsa, pamo ukufwīkigwa ukufuma ku seminale yiliyōsa. Pōpe, galipo amaseminale ukukīndapo

gayēngigwe mu Ngamu Yāke, kuli nōngwa ya bwīpùti, ukukīnda ukuya panongwa ya kilikyōsa ikīngi—kilikyōsa ikīndu ikīngi iki kyalimo siku nkīsu. Uswe tukālīmo siku nabo bulibōsa—bulibōsa ubusīmbe bwa Umwēne ukubūkāmo siku ku sukulu. Lōli, pōpe, galipo amasukulu ga kongelelāpo gayēngigwe mu Ngamu Yāke ukukīnda iyi yilipo iya lulilōsa uluko ulūngi ulwa ngamu iyi yilipo pāsi pa mabīngu, amasukulu. Uswe tukamenyemo siku Umwēne ikusīmba i būku. Pōpe, galipo amabuku agakukīndapo gasīmbigwe isya Umwēne ukukīnda fyōsa ifisyāle fya busīmbesīmbe ifi fisīmbigwe. Kangi, umwīsyūgu, i Bāngēli Lyāke lyo Būku ili liganīgwe ukukīnda aga galipo nkīsu kyōsa, pakati pa fyabusīmbesīmbe.

⁷⁴ Loli, umwe muketile, mu lisiku lya buyatilo, abene balinkulila, “Yo ani Umwene?”

⁷⁵ Muketile, Kyala ikwega ikindukimo iki kikuboneka ngati ikyene kikaya nakimo, ukutēndēka ikindukimo ukufuma ku kyēne. Ikyo kyo kikupela Umwēne Kyala.

⁷⁶ Kangi akabalilo kako abene balimbwene Umwene ikwisa, itogile ikwīngila i kipata kila, bamo mwa bene balinkuti, “Umwene yo Nnyambala unkulumba.”

⁷⁷ Abene bikuyoba ikyo umwisyugu. Silipo i sukulu sya bufundakyala isi sikumanyisya, umwisyugu, ukuti Yeso aali Nnyambala unkulumba, ukuti Umwene aali Nnyambala unnunu. Bamo mwa bene pope bikuyoba ukuti Umwene aali nsololi. Lilino, linga Umwene aali nsololi itolo, pamo Nnyambala unnunu, uswe tuli mu mbibi syitu. Umwene ali nkinda nsololi. Umwene ali nkinda Nnyambala unnunu. Pōpe, Umwene ali Nnyambala unnunu. Pōpe, Umwene ali Nsololi-Kyala. Lōli Umwēne āli nkindapo ukukīnda ikyo. Umwēne āli Kyala abonekīle mu mbili, ukwēga ubutulwanongwa.

⁷⁸ Kangi bo Umwene isile, itogile nkati, bingi ba bandu balinkuti, “Umwene yo mbumbulusyi. O, uswe tumbwene Umwene ikwīgula amaso ga bafwamaso. Uswe tumbwene Umwene alinkumpela u nnyambala undemale ukwenda. Uswe tumbwene Umwene ikupa u lwiputo, kangi i sekema yilinkundeka umwanike.” Lōli, polelo, uluko lula bānkōngāga Umwēne panongwa ya mikati ni swi.

⁷⁹ Kangi iyo yo njila ifilundilo fiyīlile umwisyugu, bingi. Linga alipo u mbumbulusi, fiki, abene—abene bikukonga Umwene, kangi Umwene yo itolo—Umwene yo itolo bufumilamīsi. Linga abene bikubina, abene bikubopa, bikuti, “O, ngimba ugwe ngulāmba unyiputile une, ukuti Untwa Yeso isakupelaga une ukuya kanunu?” Kangi nakalinga itolo bo abēne bikusōka ukufuma ku kipatala, pamo ikitala kyababine, kulakula ukugomokela nkīsu abēne bikubūka, ngati īmbwa ku matesi gāke, pamo i ngulube ku ndipa syāke, bo i Lisīmbo lyāyobile. Itolo ukunkōnga Umwēne kuli iki kinunu abēne babagile

ukwégako ukufuma ku Mwēne. Abene bikumbombela Umwene itolo ukuya i—i kifwāni, pamo—pamo ikindukimo iki—iki abēne babagile ukwisa ukufuma ku Mwene, kangu batikugūlila ukumbombela Umwene. Ikilundilo kila kikāli kikukindilila umwisyugu.

⁸⁰ Bālipo abābukoma lwele-na-yumo bābumbulusīgwe, kangu yumo āgomokīle ku kumpa Umwēne ulutufyo. Pamo ngimba abēne bāli balongo? Abēne, yumo gwa bēne, āgomokīle ukumpa Umwēne ulutūfyo, kangu a bāngi ba bēne balinkukīndilila nkyēni, kisitakupālisya.

⁸¹ Kangu linga abandu mwa Amerika, aba babumbulusigwe na Maka ga Kyala, bābagile ukusanusya indumbula syabo kwa Kyala, kwabagile ukuyako uluyigo lukutika ikīsu iki ulu lwīsakwīgāla ifilabu filifyōsa, ifi fyābagile. . . Amalūka ga filūndu kangu amalūka ga kachasyu āngāli gikuya kubumalikisyo panja pa bukētelo. Ifipānga āngāli fikuya fīsulano. Mbuketelela-mafilimu āngāli mukuya bwāsi pa Ndungu nkilo. Kangu āngali pikuyapo uluyigo ukubalanila pānja, ukukīndamo nkisu iki. Loli akabalilo kako abene bikukibona ikyene kikuboneka, ifindu ifi Kyala ikubomba, abene bakāli bikuywega, “Yo ywani Umwene? Ngimba uyu yo ywani uyu ikwisa? Ngimba ko kugu kuko abene bafumilaga? Ngimba ywani yo uyu? Nu bulagili ngimba iki kyo fiki?”

⁸² Nasiku ukwībwa, ku Johannesburg, South Africa. Une nāfikile itolo, kifuki amaminiti malongo matatu bo kukāli, pa ndege. Une nāli masiku matatu ni kilo mu mmwanya, ngatele fiyo ukuti une nubukafu nābagile ukwīma ikyene. Abēne—abēne balinyēgile une pānja ku fibānja-ifibīngilo kūko bamo maelifu malongo mahano pamo malongo ntāndatu abāndu bābūngēne. Kangu mbibimbibipo ukukīnda ukufika pa kigemo, mpaka u Mbepo Mwikemo. . . Une ndinkuketa, ukwisa ukukilania ubuyo, i—i bāsi. Kangu iyēne yāli ni kimanyilo pa yēne, “Durban.” Une nālimbwēne u ndumiana untubwa ikuya nukūmana nukuyōnga ukusōkāpo ukufuma kwa gwīse nu nna, ni kilūndi kimokyēne mainchi ntāndatu pamo lwēle kipīmmapo ukukīnda ikīngi. Umwēne āfwēle i shāti inyēlu, ni fitulikilo fikukolelela isulubali yāke mmwānya. Kangu une ndinkukētēsya u nnyāmbala unkeke yula. Une ndinkukēta kunyuma kāngi. Imboniboni yila yākindīle. Kangu pōlēlo, itolo nkabalilo, une nālubwēne u Lumuli lūla lwitūlike pamwanya pa ndumiāna unkeke yūmo, kubutali kūnyūma nkilūndilo. Kangu une ndinkukēta. Une ndinkwīnogōna, “Une nālimbwēne umwēne pabuyo bumo.” Une ndinkukētēsya umwēne, kangu u Bwēlu bula bulinkukūmilīsya ukukōlēla pamwanya pa mwēne ku maminiti manandi. Kangu une nāgūlilāga ku nsanusi ukukola amasyu amakōnge. Polēlo une ndinkukēta u ndumiana unkeke yulayula ukwīma mmwanya, ikutāga ifyākwēndēla fyāke pāsi,

kangi ikilūndi kyāke ikipīmba-amainchi-ntāndatu kyālikile pāsi kifwēne ni kinine.

⁸³ Kangi une ndinkuyoba kwa Tata. A. J. Schoeman; uyu ali Ndwmiko, ikilo iki. Une ndinkuti, “Tata. Schoeman, itolo andisya amasyu gangu. Iyene yo mboniboni.”

Umwene alinkuti, “Kanunu fiyo.”

⁸⁴ Kangi une ndinkuyoba, “Undumiana untubwa itūgēsye kunyuma kula afwēle i shāti inyēlu, kangi ifitulikilo, umwēne isile ukufuma a kāya akakoleligwa Durban, gamo amamailosi bamia kalongo na bahano ukukilania ikīsu, mu bāsi. Kangi umwēne āfimbilisigwāga ukuyōnga ukufuma ku gwīse nu nna, ukuti īse. Lōli umwēne ītike pa Ntwa Yeso, kangi umwēne ali nakyo ikilūndi kimo mainchi ntāndatu kipīmbapo ukukīnda ikīngi.”

⁸⁵ Kangi u ndumiāna untubwa yula alinkunyēla mmwanya. Pala umwēne ālipo, ikwīma, ukugela ukwīpilika kuli ifyākwēndēla fyāke. Kangi une ndinkuti, “Ndumiana untubwa, u Ntwa Yeso akubumbulwisye ugwe.” Kangi mbimbibi ikilūndi kyāke kikwīsa pāsi mainchi ntāndatu, ukuya kinunu, ni kinine kya fyēne. Kangi abene balinkuntwala unnyambala untubwa ku kigemo, kangi abaganga balinkunkētēsya umwene pala. Umwe muketile ikifwāni kyāke mwa buku gwangu.

⁸⁶ Une nālīmīle pala itolo utubalilo tunini, une nālībwēne ilinīni, iligali lyambindimbini likubopa ukusuluka pa nsebwe, kangi ilyēne lilinkutelemuka. Ilyēne lilinkusyūmbutuka ukusyūngutula, kubwakunyūmba, kangi lilinkutika ikipiki. U nkeke, undīndwana gwānyili-nyēlu āli...āli ni nyuma ingonyoke. Kangi une ndinkuyoba, “Une ngukēta akanīni, akagali kambindimbini aka kāselemukile mu mpiki gumo, kangi undīndwana unkeke gwanywili-nyelu gwa kifuki fyīnja kalongo-na-lwēle mbukusi ali ni nyuma yikonywike. Umwene ali mbwitugasye ubupalapala.” Nayumo ālyāmwīle. Kangi une ndinkutoligwa ukumbona umwene kulikosa mu kilundilo kila, ikilundilo ikinywamu ikya bandu. Kangi une nālīmīle pala itolo kuli amaminiti manāndi. Une ndinkuti, “Pilikisya. Ikye kyo...Komma ukuya bamabyebye. Umwene yo Ntwa Yeso, mu Maka ga busyuke. Umwene alintumile u Mbepo Mwikemo ukukindilila imbombo Yake.” Kangi pala une ndinkuyibona imboniboni yikuboneka kangi. Kangi une ndinkutoligwa ukumbona unkikulu untubwa.

⁸⁷ Itolo pala, pimile palapala pa nkyeni pa une, apa palinkwima u Lumuli lula, mumo umwe mukukēta pa picha. Kangi Ulwēne lulinkwima apa. Une ndinkusegelela pala, kangi pala umwene ālambalēle, pāsi pa kigemo. Une ndinkuti, “Nkīkulu nkeke, u Ntwa Yeso akupelile ugwe ukuya kanunu.” Kangi umwene alinkwanda ukukūta.

88 Unna alinkuti, “O, umma! Komma ukumbula umwene ukuti afyuke mmwanya!” Ikuti, “Linga umwene ikusema, umwene ikufwa.”

89 Kangi u nkikulu unkeke yula alinkunyela pa malundi gake, ikuywega, nukuntufya Kyala. Kangi u māma alinkusilika nukugwa mu kitala iki undindwana ālambalélemo.

Kyo fiki icyēne?

90 Itolo kifuki akabalilo kala, u nnyāmbāla yumo undondesya-busobi alinkufyūka mmwanya kunyuma kula, nukwīma ni luyayo lumo pa kikōta kimo, kangi ulūngi pa kīngi, kangi alinkuti, “Ugwe, Mmerika! Une ngutātikana na ugwe ukumbula une yo Ngamu nki iyi ugwe kubombelamo iki! Kangi kyo kipanga-kipāgūke kiliku ikya kipanga iki ugwe kubukako?” Muketile?

91 Ikyene kyo itolo kifwene. Abene batikupilikisya. Abene batikulondēsya ifindu ifi. Ifipanga fitikulondesya ku Kwisa kwa Ntwa. Kangi u Mbepo Mwikemo ali apa ukusisimikisya u Kwisa Kwake, ukukitwala Ikyene kukuboneka. Fingi fiyo. . .

Aligwesa ikulonda ukwega injila yake mwene. Iyo yo njila ikyene kyāli kula. Ikibugutila kilikyosa kyāli ni linogono lyabo bene.

92 Lōli ilyo likaya lilaalusyo ikilo iki. Ikyo kikaya iki une nguyobelapo. Loli ililālūsyo une ngukulālūsya ugwe, lyo, ngimba ugwe kwinogona fiki Ikyene kili? Ikyene kyo kili kwa ugwe. Yo ywani Uyu ikubuka mwanya-na-pāsi mfikolo? Komma abanyāmbāla. Abanyāmbāla bakabagila ukubōmba ifindu ifyo. Yo ywani Umwēne uyu ikuyoba nu kuyoba ku bandu nkilundilo, bo, “Itugesye papapa *apa*, ukukilania *apa*,” kangi amabuyo amakindanekindane mu lukomano, akabalilo kāko abakīkūlu na banyāmbāla bātwaligwe nkati muno, bikufwa? Ngimba Ikyēne kyo ywāni?

93 Unkīkūlu unkeke yula uyu ālyēndile nkati mbokēsyo ulubūnju ulu, uyu imilūngu mitatu igi gikīndilēpo, ikufwa na kānsa gwa kasinoma, ikwītūgala papapa apa pa Lukīndi Maple, Nka. Baity. Kangi une ndinkubalālūsya aba dokotala batatu aba bāli nu mwene. Umwene akāli nu lusako nalumulwene ukuya nu bumi, na bāna banini bana pamo bahano, kangi u māma gwangu ikugela ukuswila abene. Māma alinkuti, “Bill, umwene atisakwisamo siku ku kāya kangi.”

94 Kangi une nābūkīle panja kūko umwēne āli, kangi u Ntwa Yeso āyobīle, “ISI SYO IKUTI U NTWA, linga umwene isakubukaga ku kipanga nu kufinga ukōsigwa mu Ngamu ya Ntwa Yeso, kangi isakumbōmbéla Kyala, umwēne isakubūkāga kukāya, kanunu.”

Kangi une nalindalusisye umwene, “Ngimba ugwe kubombaga iki, nkikulu?”

⁹⁵ Kangi umwene alinkuti, “Fyosa ifi ugwe kuyoba, une ngubombaga ikyene.” Palapa ububabe bulinkuleka. Amasiku matatu pankyēni pāke, umwēne āli ku kāya, kangi abagānga bikutoligwa ukwāga nakasyalikile kamokēne ka kānsa yula.

⁹⁶ Ngimba Yo ywāni Uyu yūyo ikwisa mu Ngamu ya Ntwa? Yo ani Umwene? Umwene yo Mbepo Mwikemo gwa Kyala. Ngimba amīnogono ga Ikyēne? Ngimba amīnogono gīnu go fiki, mumēnye untīmi gwīnu? Kangi akabalilo kako bitugesye mfikota ifi apa, abandū ukufuma panja pa kāya, bitugesye ni fisilisi, bitugesye ni. . . Apa itūgēsye u nnyāmbāla, pabuyo bumo nkati muno, u nkūdwe gwa kiMenonite, papapa apa, unkubilwa ni fisilisi. Nasiku ukummanyamo pamo ukumbonamo umwēne, nakimo ukufwāna nu mwēne. Kangi nakalinga itolo, kifuki fyīnja fibili ifi fikīndīle, une ngusakikisya, pamo ikindukimo, ena, ifyīnja fibili, u Mbepo Mwikemo alinkukikolela ikyene, kangi alinkuti “ISI SYO IKUTI U NTWA.” Umwene akaya nako siku nukugwa ukufuma pala. Yo ywani Umwene? Yo ywani Umwēne?

⁹⁷ Unkikulu uyu ālitugesye apa, Pandungu ugu gukīndile, akabalilo kabumalikisyo une nāli apa, twālisīle ukufuma ku buyo bumo mu Illinois. Ilisiku ilikonge. . . Ni lyūlu ilinywāmu mu mbili gwāke, ili lyābālaga. Kangi bamo mwa banunu-fīyo aba sayansi gwa mikota ba Illinois bāmmwēgelāga umwēne ku kiliniki ingulūmba, ukuti bakampānje, Kilēmbèlo. Kangi umwene alinkwīfinyilisya injila yake nkati. Ngambonamo siku umwene pamo alinkupilika isya umwene, mbumi bwangu bosa. Kangi mbibimbibi itolo, u Mbepo Mwikemo alinkukupilila umwene, kangi Umwene alinkumbula umwene uyu umwene aali, kūko umwēne āfumileko, kangi umwēne āyaga pakupānjigwa ilisiku ilikonge. Balinga bāli apa akabalilo kala, ukukibona kila? Kangi kēta inongwa yikwēndelega ukugomokela. Ilisiku ilikonge, akabalilo kāko umwēne ābūkile ku bagānga, abēne balimmwēgile umwēne ukufuma ku kiliniki ukubuka ku kiliniki, kangi bakabagīla ukwāga akasyālepo kamo ka ikyēne.

⁹⁸ Yo ywani Uyu? O, Kyala yaga gwākīsa! Ngimba yo ywani Uyu uyu ikubomba iki? Ngimba ugwe ubagīle ukusulwa ukuyoba ikyēne āli ntimi gwāko? Nasiku. Ngimba ugwe ubagīle ukusulwa ukuyoba abāndū bāli na kandu kalikosa ukubōmba mu kyēne? Nasiku. Ikyēne yo Mbepo Mwikemo, u Mbepo uyu aali pa Ntwa gwtu Yeso. Kangi Ukwisa Kwake ukwibungānia Mwene ni Kipanga Kyake, kili kifuki fiyo mpaka Umwene ikubalania pānja ulu u Lumuli Lwake ulukulumba, ukutabula, kangi ukutwala mbulilani, i Kipanga kya Kyala gwabumi, panongwa ya Kunyakiligwa kuko kuli kifuki ku kiboko. Ameni!

⁹⁹ Yo ywāni Uyu? Une ngabagīla ukwāmūla ililālusyo lyāko. Une ngabagīla ukūkwāmūla ugwe. Lōli une mbagīle ukwīyāmūlila nīmwenene. Kangi ukukilania i kegemo ikikemesigwe iki, ikilo iki, mu mbulukutu sya iki, ububīkisye, kangi a—a būligwe ba Lilopa lya Ntwa Yeso, une nguyoba iki

ukufuma pāsi pa ndumbula yangu. Komma panongwa yakuti ukuti une ndi yūmo gwa umwe, komma panongwa yakuti une ne itolo mūndu yumo unkīndāne, lōli yumo mwa batabuligwe uyu asūkigwe ni Lilopa. Une ngwitika ukuti u Lumuli lulalula ulu lwītulike mu kipanga iki, ikilo iki, yulayula Yula ikunāngīsyā, ukwisila mu kipeligwa Kyāke, ukuti Ikyēne yo Yeso Kristi, mbubumbigwe bwa Mbepo Mwikemo.

¹⁰⁰ Aligwesa uyu amenye i Lisimbo, amenye ukuti Yeso āyobīle, “Une nisile ukufuma kwa Kyala, kangī une ngubuka kwa Kyala.” Bo Umwene akāli ukupeligwa mbili, akabalilo kako na Mōse mmatengele, Umwene āli Mbanda ya Moto. Kangī akabalilo kāko Mōse alinkunyonywa ukunketa Umwēne, Umwēne alinkukilania ifiyabo Fyake ifyākunyuma ku mwene. Kangī Mōse alinkuti, “Umwēne ikuboneka ngati Nnyambala.” Akabalilo kāko Umwēne aali apa pa kisu, Umwene aali Nnyambala. Umwene abombile ifindu filafila ifi Umwene ikubomba, umwisyugu, ukwisila mbanyambala aba Umwene atabwīle. Pala Umwene ikwisa nukuya ni kifwani Kyake kyegigwe. Ngimba ikyene kyo fiki?

¹⁰¹ Ukufuma pa bufwe Bwake, ukusyiligwa nu busyūke, Pauli āli pa nsebwe gwake ugwa ku Damasiko, ilisiku limo, kangī u Lumuli ulukulumba lulinkundupulila umwene pāsi. Abanyambala bala ukusyungutila umwēne bakālubwēne u Lumuli lula. Lōli Ulwēne lilinkuntikila Pauli pāsi, mpaka Ulwēne lulinkumpela umwene ukuya mfwamaso. Umwene ali nu lutamio na maso gake u bumi bwake bosa. Kangī umwene alinkuyoba akabalilo kamo, “Ukupāgulapo papo une njege mfyūsīgwe ukukīnda u bwingi bwa busetuli, bwapegigwe kwa une,” u mwifwa mu mbili gwāke, u ntumigwa gwa Sētāno, ukumpūlānia umwēne. Panongwa yakuti ikyene kyaali bwisusye bwa busetuli.

¹⁰² Kangī akabalilo kāko Pauli ātikiligwe pāsi, pa nsebwe gwāke ukufwīma abāndu aba batēndekāga unjwēgo mwīngi fiyo; ikibugutila ikipāpigwe-kāngi, a bāndu aba bākōleligwāga basāmbuke. Pauli āli pa nsebwe gwāke ugwakufwīma bala, ni fikalatasi mu nyāmbi yāke, ukubakamata abēne nukubatwāla abēne ku Yerusalemu. Kangī ukufwana pakati pa lisiku, pala palinkwīsa u Bwēlu pāsi, ubu bwālinkomīle umwēne ukufuma pa malundi gāke, ukubūka pa kipālo, kangī umwene āgwīle ndufumbi lwa kisu. Palikwīsa i Lisyu ukufuma Bwēlu bula, liyoba, “Sauli, Sauli, fiki ugwe kumfwīma Une?”

¹⁰³ Kangī Sauli alinkusyūmbutūka, nkayīlo kāke akafwamaso, alinkukēta pamwanya. Kangī umwēne ābagile ukukēta ibukulumba bula, u Bwēlu bwālwmīko. Kangī umwene alinkuti, “Ntwa, Yogwe ani Ugwe?”

¹⁰⁴ Umwene alinkuti, “Une ne Yeso. Une mfumile kwa Kyala; Une nābukile kwa Kyala. Une nisile ukufuma kwa Kyala; Une

ngugomokela kwa Kyala.” Umwēne alinkuti, “Ikyēne kyo kikafu kuli ugwe ukubāya ukulwāna ni fyākulasa.”

¹⁰⁵ Ubusetuli bumobwēne pa nsānga unkemesigwe gula, akabalilo kamo pamwanya pa buyo bula, unnyāmbala akabagila ukuya yulayula. U mūndu, bo umwēne akāli ukwilīngānia mwēne Nkristi, bo umwēne akāli ukwilīngānia mwēne, umwēne abāgile ikyākūwānda ayege nu bwēndemo bwa kunyuma-kwalulangalanga, kūko umwēne ālyāgēne na Kyala, pamāso na māso.

¹⁰⁶ Kabuno, umwisyugu, ugwe ubagile ukuya nu luko lulilosa ulwa lyāmulo. Ugwe ubagile ukunkēta u Ntwa ikubōmba itolo katikati iki Umwēne āyobile bōmba, kangi abafundakyala abakomu bisakulīngānia Ikyēne ukusōsyāpo. Abēne bisakuyobāga, “Ikyo kyāli kya lisiku ilingi. Ikyēne kyāli kya *iki*. Pamo, Ikyēne kyo kya ngulilo iyingi. Pamo, Ikyēne kyo kisobi.” Bomūmo abene bāyobile isya Yeso, “Umwēne yo Belezebabu, u mōhesi. Umwene yo ndagusi.” Kangi i findu fyosa fila, abene bali nu lwāmulo lumo.

¹⁰⁷ Loli akabalilo kāko u nnyambala isilemo siku mu kupalamāsānia na Kristi, kangi alimbwene Umwene bomūmo Pauli ābombīle, pamo bammwēndilemo Umwēne, bakayapo nabamo abakufwāna abafundakyala nkīsu ukuyamo siku bākubagila ukulīngānia ukusōsyāpo ubwēndēlo ukufuma ku mūndu yumo.

¹⁰⁸ Iyo yo nongwa, umwisyugu, abene bakaya nu bwendelo. Iyo yo nongwa abene bakabagila ukuyoba. . . abēne bōsa bikuyoba, “Yo ywani Uyu? Ngimba Iki kyo fiki? Ngimba Ikyēne kikufumila kugu?” Abene bakaya nalyo ilyakwamula. Fiki? Panongwa yakuti, kyosa abene bamenye bo bufunda-kyala ubu ikipanga kimo kitendike. Komma “ukumanya ubufundakyala” bo Bumi. Komma “ukumanya ili Bangeli” bo Bumi.

¹⁰⁹ Loli “ukumanya Umwene” bo Bumi. “Ukumanya Umwene” ukuya Mpoki gwakonagwako, ukuya Yuyo Uyu išwīsyē ugwe nu Kuyapo Kwake. Ugwe gwāli kula akabalilo kāko ikyēne kyābonīke. Akayapo nayumo abagile ukwēga Ikyēne ukufuma kwa ugwe. Akayapo nayumo ntiga uyu abāgile ukulingania ukusōsyāpo Ikyene kwa ugwe. Akabalilo kāko ikyakuboneka kila kikuboneka kwa ugwe, ugwe kumanya Uyu Umwene ali. Kwa une, Umwene yo Yeso Kristi yulayula mmayolo, umwisyugu, na bwilanabwila.

¹¹⁰ Ngimba yo ywani uyu ikubomba ifika ifi? Yo ywani uyu ikubomba imbombo ingulumba isi? Ngimba umwene yo ndumbilili? Ngimba umwene yo Oral Roberts? Ngimba umwene yo Billy Graham? Ngimba ikyene yo Jack Schuler? William Branham? Kilikyōsa ikyēne kibagile ukuya, abēne bakaya nakyo nakimo ikyakubōmba mu kyēne. Abēne bo fyombo.

¹¹¹ Umwene yo Mbepo Mwikemo ikusooka panja ni Nongwainunu, mu fimanyilo ni fiswigo ni fika, ukupela abandu bītendekisye. Imbepo yinyenyemusigwe nu bugūlili, na bītiki ukugūlila Umwēne ukwīsa.

¹¹² Kangi abangi bikuyoba, “Fiki isasano isi? Nongwa ya fiki uswe tukuya na ikyēne? Unko uswe tusēngāme pāsi ku kipānga kimo.” Fiki, ikyene kiyobigwe nkipanga papapa apa, ukuti, akabalilo kāko uswe twālyāndīle ukuyenga i kipanga ikipya, balinkuti, “Uswe tutikulonda ifika. Uswe tutikulonda ifindu ifi kangi mma. Ugwe kulonda ifyene, bukaga panja pa ngunda kuko ifyene fikuboneka. Uswe tutikulonda ifyene apa.” Akabalilo kāko i Branham Tabernacle yikwīnāma ku bula ubuyo ubwāpasi, iyēne yībīle.

¹¹³ Ikipanga iki kyo kyālyāligwe pa fundo na Maka kangi i Nongwainunu ya Yeso Kristi. Kangi akabalilo kosa aka ikipanga iki kikwima, u Mbepo Mwikemo alikwaga ukufikila ku myoyo, ukuponesya, kangi ukwīsusya na Mbepo Mwikemo, kangi ukubumbulusya ababine. Kwa une, Umwene yo Yeso Kristi yulayula mmayolo, umwisyugu, kangi bwilanabwila.

Unko uswe twipute.

¹¹⁴ Linga ugwe ukamanyanya Uyu Umwene ali, ugwe ukamanyanya iki fyosa ifi fyo fiki, kangi ugwe kulonda ukumanyanya, ngimba ugwe ubagile itolo ukubōmba ifingī fiyo bo ukufyūsya ikiboko kyāko? Kangi yoba, ukwisila mu kufyusya ikiboko kyako, “Nyīputīla une, Nkundwe Branham, ukuti une ngummanyanga Umwēne.” Kangi u Ntwa akusaye ugwe. Kangi mosa ukusyungutila, une ngukēta amaboko gīnu.

¹¹⁵ Lilino, Tāta Gwakumwanyanya, uswe tukutwala i Ndumi iyi, kangi iseke sya bandu bikufyusya amaboko gabo, ukuti abēne bikulōnda ukumanyanya Yūyo Uyu ali. Abēne bikulōnda ukumanyanya na Yeso unkulumba uyu. Ukuti, Ukwisa Kwake, ukwa busyuke, kuli kifuki fiyo, mpaka ababine bilwanda bikuya babumbulusigwe. Kangi ukufūma pāpo ikyo kyābonike pa buyo, polelo ubusolōli bwālīsile mu Kipānga, polelo ifikūngilwa ni fika, lilino ukusuluka ku kimanyilo kyabumalikisyo kila. Ikyakukōnga kisa kwīsa, u Bunyakiligo, i Kipanga kisakwegigwaga. Kangi uswe, Ntwa, twe twiyobelāga ukukumanyanya Ugwe mu Maka ga busyūke Bwāko, uswe tukugūlila, kangi tukwīsūka, nukulila, nukulāmba “Gweisa, Ntwa Yeso!”

¹¹⁶ Nyakāga i Kipānga Kyāko nukukyēga Ikyēne ukusōkāpo, mbibimbibi, Ntwa. Kabūno, lululu, abanyāmbāla bisakupufulāga i kīsu iki Ugwe gwāpelile kuli abēne ukwītūgalāpo, panongwa yakuti abēne basūlile Ugwe. Abēne bakafūnda ulutēngāno, lōli ubwīte. Abēne bakafūnda ubugolofu, lōli abēne abēne bafūndile ubunyāmbūta. Mūmo fikuti abēne bakābagile bōsa ukuya ba njala ya maka! Ntwa,

akabuyo akanini kala mu ndumbula syabo aka kakypela abene ukuya banjala kuli amaka, abēne bikugela ukwikutisya ikyēne mu nnyūmba-syasayansi kubuyo bumo, ukupufulania abāndu bīnabo.

¹¹⁷ Kyāla, linga abēne bābagile itolo ukusyāgānia ukuti amaka gala aga abēne bikulōndēsya go Maka ga busyuke bwa Mwanundumiana gwa Kyala, a Maka ga Mbepo Mwikemo ukusanusya imyumi gyābo; komma ukupufula ifisu, loli ukusanusya ubumi bwabo kangī ukubapela abene ukuya babombombombo Bako.

¹¹⁸ Abāndu bīngi, batikīgwe nu kigili kyandīsyu, abēne bikulīngānia uswe ukuya kipāmbō kya “kisita kumanya nakimo,” kangī—kangī ukuya “basāmbuke,” bo abēne bābōmbile mmasiku agāpakwānda. Lōli bo abēne bagomokīle, bikusangaluka, ukukupālisya Ugwe ukuti abēne bābagile ukupimba ulufuyulo lwa Ngamu Yāko. Uko ko kwīpilika kwa bana Bako, ikilo iki, Ntwa, kulikosa. Uswe tuli itolo bahobofu.

¹¹⁹ Bamo mu lisiku Lyako bāgelīle ukukulīngania Ugwe. Abēne balinkuti, “Umwēne yo mwīnāke gwa nnyāmbāla ugwāndisu yula, Yohāni, uyu āfumile ku matēngēle kifuki kisita kufwāla imyēnda, itolo ikipapa kyang’ōsi ikyaiyolo kiniēmbīgwe ukusyūngutīla umwēne. U nnyāmbāla gwāndisu uyu āsopāga amasyu, kubusōkēlo na kubwīngililo, kangī āyobile, ‘I ndwānga yilāmbalikigwe ku misisi gya mpiki.’” Balinkuti, “Umwēne yo u—u nkōngi gwa umwēne. Umwēne yo nnyāmbāla gwa ndīsu. Umwēne yo nsyūtano. Umwēne asōkilemo mu līnogonelo Lyāke.” Ubutumigwe ubukindakipeligwa ubu bwaali na Ugwe, O Ntwa, bwāgōgile amaso ga bala.

¹²⁰ Kangi mo mumo kiyilile ikyene kangī umwisyugu: U Mbepo Mwikemo unkulumba uyu ikulongolela u Kwisa kwa Ntwa, mumo Yohani ābombile mu lisiku lyake, ukugog’amaso a bāndu, ku bala bābo batikulōnda ukukēta. Lōli ku bala aba bīganile ukuketa, Ugwe ubasalile abene. “Kangi bōsa aba Tāta ambele Une bisakwisaga kwa Une,” Ugwe gwāyobīle, “kangi nayumo gwa bēne isakutāgigwāga. Kangi une nisakusyūsyāga umwēne mmwanya ku lisiku lwabumalikisyo.” Uswe tukupālisya Ugwe panongwa ya iki.

¹²¹ Kangi bala bābo bafyūsīsyē amaboko gābo, ikilo iki, uswe tukusuma, O Ntwa Kyala, ukuti Ugwe kwitēndekāga Gwīmwēne ukumanyigwa ku bēne, mu bwendelemo bumo, mu Maka ga busyuke. Tupaga ikyene, Ntwa.

¹²² Kangi abangi babāgile ukuya apa, aba bakafyusisye ikiboko kyabo, loli palema, mu ndumbula syabo, abene bameenye ukuti abene bafumbwaga ikyēne. Une ngusuma ukuti Ugwe kubasayaga abene, nukubapa abene ikinyonywo kya ndumbula syabo.

123 Akabalilo kako uswe tukusōkàmo mu nyumba, ikilo iki, tulibukaga uswe ukuya bandu abakindane. Tulibukaga uswe nu bubīngililo ubukindane ukukinda mumo uswe twayiliile, linga ikyene kyalwanaga nu bwigane Bwako Bwabunyakyala. Tuli sookaga panja ukuya nu ulwikasyo ukukola i mbembe sya kigemo, mpaka u moyo gwitu gwikutisigwe ukuti uswe twāli nu bwendelemo na Ugwe, kangī uswe tumenye isya Yūyo uswe tukuyoba, nongwa yakuti uswe twāgéne nu Mwēne nukumanya Umwēne, nukuya nu bulilanisi nu Mwēne. Tupaga ifindu ifi, Tata. Bumbulussyaga ababine na bonywa.

124 Sayaga untimi gwitu unganigwa kangī umpala. Kyala, uswe tukusuma ukuti Ugwe kuyaga nu mwēne na bākalumbu bake abaganigwa, akabalilo kāko abēne bikwimba Inongwainunu, nukuluumbilila Iyene mu rediyo yabo.

125 Sayaga abahesya aba bali mfipata fyītu. Ntwa, abēne balisōkága pānja, ikilo iki, nu kunyenyemusya mu ndūmbūla syābo, ni fundo ukuti abēne, ukufuma pa sala iyi ukubuka nkyēne, linga abēne bakakumanya Ugwe kangī bakakubōmboēla Ugwe, pabutasi, abēne balikubōmbelaga Ugwe. Bo tumenye iki, ukuti, “Ifindu fyosa ifingi fikwisaga ku nakimo, loli i Lisyu lya Ntwa lisakusyalaga bwilanabwila.” Tupaga ikyene, Tata.

126 Tuswaga uswe, syōsa isya mbībi syītu. Kangī uswe tuli aganāga pa buyo ubukulumba bula. . . [Ubuyo busitakandu pa tepi—Nsimbi.]

Panongwa yakuti Umwene alinganile une
Kangi ālyūlīle ubupoki bwāngu
Pa mpiki gwa Kalvari.

127 Lilino, ukufuma pa Ndumi, unko uswe itolo twinamisye imitu gyitu nukumwiputa Umwene, akabalilo kako uswe tukwimba ku Mwene.

Une nunganile Umwene,
Ni ndumbula yako yosa.

Une nunganile Umwene
Panongwa yakuti Umwene alinganile une
Kangi ālyūlīle ubupoki bwāngu
Pa mpiki gwa Kalvari.

128 Balinga aba naloliloli bangānile Umwene? Fyusya ikiboko kyako, yoba iki nu nketi yumo, “Une nunganile Umwene.” O, ngimba Umwene akaya nswigisye? Umwe mumenye, une itolo nkiganile ukwitugasya bo ulu nukunwa itolo mu njila, u Kuyapo Kwāke. Lisyu Lyake, libukile panja, Ilyene ligwīlīle mu ndumbula. Ilyēne likutufunda uswe. Ilyēne likututwāla uswe mu kupilikila kwa Mbepo Gwāke. Mūmo kuyīlīle kumogi ukwēne itolo ukummwīputa Umwēne polelo! Lilino,

bo umwe mukubūka ukufuma ku kipānga, ikilo iki, būka, mukummwīputa Umwēne.

¹²⁹ Kangi kumbukilaga, undungu ugu, lulipo ulukomano lwa lwīpúto apa pa kilo kya Kitatu. Komma ukwībwa ubufumusye bwa Nkundwe Neville pa Ndungu, pamo pa Mpyagilo, pa sala ya lwele-na-yimo, ukukilania WLRP. Une itolo nkiganile ukupilika abēne, bule umwe? Ubwīmbi bwābāna, pamo bwābatātu, bukupiligwa bumogi. Nkasi na une, kangi a bāna, uswe twēsa tukwēga i rediyo innini pānja kangi—kangi tukwītulika ukusyūngutila iyēne, ukumpilikisya Nkundwe Neville nu bufumusye bwake, kangi amasyu gāke amanunu, isya mūmo umwēne ikumfyūsya Kyala yūyo umwēne angānile kangi ikwītika. Komma ukuyoba iki ku . . .

¹³⁰ Umwe bahesya apa, linga umwe mukaya ni kipanga kya ku kāya, isaga yaga nanuswe. Une ngubabula umwe, komma ukuyoba iki kangi umwene itugesye apa. Umma, nkulumba. Une njobile iki, utubalilo twingi. Une nunganile Nkundwe Neville. Iki, ikyakwanda, umwene yo mfundakyala. Ikindu kyakwanda, umwene yo mwana gwa Kyala. Ikindu ikikonge, umwene yo yulayula lisiku lililyōsa. Une nummenye umwene ku fyinja. Umwene akasanukamo siku, na panandi. Umwene akaali yo Orman Neville, ugwambombo gwa Ntwa Yeso. Kangi une ngwinogona umwene ali na . . .

¹³¹ Iki kimo, une ndinkukōlela pala, ukunsuma umwene linga umwene akābombile, mu lubatiko lwake, ābagile ukutēndēka ubuyo kuli uswe ukwisa pāsi nukwīputila ababine. Bālipo bāmo bikwisa nkati, kwāli ulubūnju ulu, umwe mumenye. Kangi unkasi gwāke unnini ālyāmwile i foni, kangi une nāyobaga ku nkasi gwangu, kunyuma kula, ukufwana ni kyene.

¹³² Kangi mumo uswe tukupalisya Kyala panongwa ya nkasi gwake unganigwa unnini kangi ikikolo kyake. Ikyo kyo kinunu fiyo. Akabalilo kāko ugwe kumbona u ndumbilili nu nkasi gwāke ukwisa pala bo lula, mbunoge kangi ulwiyufyo, ikyo itolo kikutēndēka ikipānga ukubūka ikyo kanunupo fiyo. Ikyo kyo itolo kinyafupo mumo amasiku gikukinda.

¹³³ Ugwe unganile Umwene ni ndumbula yako yosa? Umma ndaga. Uswe tulinayo ulwimbo ulwakusātilla ukuti uswe tukwimba, *Ega i Ngamu Ya Yeso Na Ugwe*. Kangi tupapo uswe akasambo akanini, kalumbu, linga ugwe uli nalo ulwene pala mwa buku. Kangi uswe tukwimbaga ulwimbo lwitu ulwakusātilla. Kangi akabalilo kako uswe tukwimba ilinandi lyakwanda, uswe tukulonda ukusyumbutuka, ukuponania amaboko ga yumo nu nnine. Umma ndaga. Tupapo uswe u lusambo.

. . . i Ngamu ya Yesu na ugwe,
Mwana wa busulumanie ni soka;
Iyene ubuhofu nu lupembusyo lisakukupaga,

Ega Iyene kulikosa ugwe kubuka.

Ngamu Imbala, O yo nyafunki!

Lusubilo lwa kisu kang'i buhofu bwa
Kumwanya; (Kyala akusaye ugwe, nkundwe.)

Ngamu Imbala, O yo nyafunki!

Lusubilo lwa kisu kang'i buhofu bwa
Kumwanya.

Unko uswe twêge ili linandi ili lilino:

Pa Ngamu ya Yesu tukwinama,
Tukugwa bulambalale pa malundi Gake,
Mwalafyale gwa banyafyale ku Mwanya
bisamfwika ingiga Umwene,
Akabalilo kako ubulendo bwitu bumalike.
(Ngimba ikyo kitisakuyaga kyakwikyela?)

Imbala . . . (Ngamu Imbala!) O bunyafu buki!

Lusubilo lwa kisu kang'i buhofu bwa
Kumwanya;

Ngamu Imbala, (Ngamu Imbala!) O yo
nyafunki!

Lusubilo lwa kisu kang'i buhofu bwa . . .

¹³⁴ Balinga bikukumbukila akĩmbo kĩtu akanini uswe twālisibile ukwĩmba, *Komma Ukwĩbwa U Lwĩpũto Lwa Kikolo?* Umwe mukukumbukila ikylene? Une ndiku . . . Thelma, kali ugwe umenye ulo, pamo ulusambo, pamo mma? Unko uswe tugele ulwene kamokene. Ngimba umwe mutikukumbukila ulwene? Unko uswe . . . Lumo une mbagĩle ukugela ulwēne kamokene na umwe.

Komma ukwĩbwa u lwĩpũto lwa kikolo,

Yeso ikulonda ukwagana na ugwe mula;

Umwēne isakukwēgāga imbāsyō syāko syōsa,

O, komma ukwĩbwa u lwĩpũto lwa kikolo.

¹³⁵ Balinga bali ni lwiputo lwa kikolo? Ikyo kyo kinunu. Unko uswe tugele ulwēne kangi. Une nisakugomokelaga kangi nkati mula. Une nkiganile ikyo. Twēsa palikimo lilino:

Komma—komma ukwĩbwa u lwĩpũto kwa
kikolo,

Yeso ikulonda ukwagana na ugwe mula;

U mwēne isakukwēgāga imbāsyō syāko syōsa,

O, komma ukwĩbwa u lwĩpũto kwa kikolo.

¹³⁶ O Ntwa, ukwene kusimbigwe mu Masimbo, ukuti abene begaga ukufuma mumbili gwa Pauli ififunga pamo utwenda-twakupiyila, kang'i imbepo inyali silinkusōka ukufuma ku bāndu, ni mbungo silinkubumbulusigwa. Uswe tukwĩpũta, O Ntwa, ukuti bo injila yilayila, ikyēne kisakunāngisigwa pa ifi, ikilo iki, bo une ngutuma ifyēne ku bafũmbwe na babine. Panja kubuyobumo mu fisu, alipo yumo ikugũlila nukugũlila iki

ukuboneka. Une ngusuma, Tāta, ukuti Ugwe kupaga ikyene mu Ngamu ya Yeso, u Mwanundumiana Gwako. Ameni.

¹³⁷ Lilino une nguyaga pakunsuma, bo uswe tukwinamisya imitu gyitu, linga u Nkundwe gwitu umpala Smith ukukilania kula, ukufuma ku Kipanga kya Kyala, uyu uswe tummwāgile, itolo bo yu Nkundwe gwitu Neville apa, ukuya nsūbilígwa, ugwambombo gwa Kyala, Une ngunsumaga umwene ukusuma isayo pa umwe, ukukindilila ukukinda undungu ugu gukwisa. Kyala abasaye umwe, mpaka uswe twagane na umwe kangi. Nkundwe Smith.

[Nkundwe Smith ikwiputa—Nsimbi] Ena, Ntwa. Tupaga ikyene, Ntwa. Ena. Ena. Ena. Ena. Ameni.

¹³⁸ Ponania amaboko ga yumo nu nnine. Mukwambililígwa ukugomokela kangi, ku kipanga. Kyala abasaye umwe. 🐦

59-0510E Yo Ywāni Uyu?
Kitembe Kya Branham
Jeffersonville, Indiana U.S.A.

KYANGONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Ukusanania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org